

## XXXV. BASARRI BERTSOPAPER SARIA 2019

### 1º Saria: Ekaitz Goikoetxea Asurabarrena *Nola ez dakizun hori* Doinua: ETaren suetenetik

- 1.-Itxi gabeko zauri ta  
lur jotako zeru pusken  
hondakinekin zaila da  
ongizatea gorpuzten.  
Hitzak hotsari keinuka,  
ikara beldurra puzten,  
garai batean atepak  
sokaz zabaltzen zituzten;  
orain serrail ta alarmak  
baino ez ditut ikusten,  
hara itzalen itzalek  
nora eraman gaituzten!  
Ametsei ere ez zaie  
lotara geratzen uzten.
- 2.-Ateoak katedradun,  
kaletarrak artaburu,  
mikroskopio aurrean  
astegun nahiz asteburu;  
teknologia berriak  
ta robotika helburu,  
pilula magikoekin  
tematuta dihardugu...  
Tradizioei et, et, et,  
iraganari tururu,  
munduak alimaleko  
abiadura hartu du,  
etorkizunera ere  
orain iritsi nahi dugu.
- 3.-Aski ez euri tantak ta  
eguzkiaren distira,  
tomateei sulfatoa,  
babarrunei pestizida.  
Gaurko umeek ez dute  
pizza besterik desira,  
masa zapal koipetsu bat  
ta gainean bi oliba...  
Limoi ura isurtzen zait  
plateretara begira,  
piperrik ulertzekotan  
bi arrautza behar dira,  
gure menua gehiegi  
(h)a(n)burgesatzen ari da.
- 4.-Orain semeak baleta,  
orain alabak dotrina,  
gero supermerkatua  
hustu iskinaz iskina.  
*"Aita, nik Kas limoi nahi det",*  
*"Ama, nik zumo de piña",*  
poltsak berrogei xentimo,  
hamabi euro parkina...  
Noiznahi ostia soinua,  
maldizio ta zikina,  
eramangarriagoa  
litzateke gure mina,  
okerrago bizi arren  
hobeto hilko bagina.
- 5.-Egunean bost lanordu  
urtean hiru bidaia,  
Aste Santua Parisen,  
Baqueira eski garaia,  
Hollywoodeko glamourra,  
Elizondoko paisaia,  
dantzaldi amaigabea,  
ajerik gabeko jaia...  
Behar dudan maitalea,  
maite nauen senargaia,  
kale-kantoi itsu bat da  
gure borroka-zelaia,  
ezer galdu ezina ta  
dena irabazi nahia.
- 6.-Abiadura Handiko  
Trena da suge-sugea,  
zainak pozoiz mailukatzen  
ari zaigun ingudea;  
porlanez eta adreiluz  
josi dugu orubea,  
agur harizti itzaltsu  
agur baso ainubea!  
Bizkarrean hotzikara,  
sudurrean azkurea,  
kontzientziari pasa  
behar zaio ITVa,  
gu gara munduarenak,  
mundua ez da gurea.
- 7.-Ezin izan dugulako  
porrotarekin berdindu,  
bihotzak ez al zaizkigu  
gorrotoaz maitemindu?  
Auto-determinaturik,  
ez hanka ta ez txirrindu,  
zerua ez da ileen  
neurri berean urdinu.  
Nahiz lurrak gizakiari  
maita dezala agindu,  
sustraietara errotzen  
ez da asko ahalegindu,  
menditik kalera eta  
goitik behera egin du.
- 8.-Nahiz eta sateliteek  
argi printzak iragarri,  
biharamuna ezin da  
asmo hutsez erakarri.  
Ahoa ez bada aho  
ta belarria belarri,  
Jainko garela alferrik  
egingo dugu aldarri;  
irla bakartien gose,  
auzoko behien egarri,  
errape lehorrak saltzen  
aritu gabe elkarri,  
mugak onartutakoan  
izango gara mugarri.
- 9.-Ez dut nahi kutsatutako  
lerrobururik Berrian,  
ez maiatzik urrian, ez  
negurik udaberrian;  
oinetan abarka beltzak,  
segapotoa gerrian,  
urratsak pauso txikia  
eta neurriak neurrian.  
Izan fedea langile  
xumearen izerdian,  
egunez loa bezatu,  
amets egin gauerdian,  
atzera bizi gaitezen  
aurrera doan herrian.